

Вячеслав Иванович Худяев

Коми Республикаса Юралысьлөн 2021 во моз тöлысь 6 лунся 99 №-а Индöдөн сетöма «Почёта гражданин» Коми Республикаса медвылыс почёт ним.

В.И. Худяев чужис Сыктывкарын 1946 вося рака тöлысь 6 лунö. 1969 воын Ленинградса инженерно-стрöительной институтын стрöитчан факультет помалöм бöрын Вячеслав Иванович пырис уджавны Главкомгазнефтистрöйлөн Кöрт да бетон сора изделиеяс вöчан Ухтаса заводö инженер-технологөн. Заводын 6 во чöж уджалігөн Вячеслав Иванович инженерсянь воöдчис директорöдз.

1976 воын В.И. Худяевöс индiсны КПСС-лөн Коми областной комитетын стрöитчан юкөнөн заведуйтысьöс вежысьөн. Сійö кывкутіс туйяс да посьяс стрöитöм вöсна. 1980 воын Вячеслав Ивановичöс бöрйисны мöд секретарөн, а 1985 воын – КПСС-лөн Сыктывкарса горкомлөн медводдза секретарөн. Тайö кадö ыджыд öдөн сöвмис Коми АССР-са юркарлөн экономикаыс. Буретш сэки заводітiсны уджавны Сыктывкарса ЛПК-ын бумага вöчан нельöд да витöд машинаяс, туалетной бумага вöчан цех, кытöм материалъяс вöчан фабрика, металлысь изделиеяс вöчан завод, ЛДК-ын косьтан да пакетируйтан линия.

Вячеслав Иванович сöвмöдiс Сыктывкарлысь социальной инфраструктурасö. Быд во республикаса юркарын кыпöдiсны 150 – 170 сюрс м² оланін, 2-3 детсад, выль школаяс, йöзлысь дзоньвидзалун видзан объектъяс.

1987 воын В.И. Худяев босьтчис веськöдлыны Коми АССР-са Министръяс Советөн. 1987-1990 воясö республика сöвмис ыджыд öдөн. Быд во перйисны 30 миллион тоннаöдз из шом, 21 миллион тоннаöдз мусир, 4 миллиард м³ биару, 25 миллион м³ вöр. Республикалөн историяын та мында из шомсö, мусирсö, биарусö эз перйивны да вöрсö эз пöрöдлыны. Тайö кадö вынсьöдöма 2000 воöдз оланін стрöитан уджтас. Сійö кадö во чöжөн кыпöдлісны 840 сюрс м² оланін, 10-12 детсад, 4-5 школа. 7 во чöжөн лэптiсны Кöрткерöсын, Княжпогостын, Емдінын, Мылдінын, Печораын, Интаын, Сыктывкарын больничаяс.

Вячеслав Иванович котыртiс «Книга памяти» йöзöдöмсö, веськöдліс Коми войтырлөн I съездса оргкомитетөн. В.И. Худяев дырйи республикаса лунвыв районъяслы сетiсны Ылі Войвыв районъяс дорö öткодялöм районъяслысь статус. Сійö зiля пырöдчис Войвывъяс йылысь федеральной оланпас дасьтöмö да примитöмö. Тайö оланпас серти кокньöдъясөн миян республикаса да мукöдлаын олысь йöз вöдитчöны öнöдз на.

1995 воын Вячеслав Иванович кутiс юрнуöдны Коми Республикаса туй отрасльöн. Сійö лоис Коми Республикаса архитектура, стрöитчöм да энергетика министерствоын Коми республиканской туй департаментса медыджыд директорөн. Та бöрын 8 во чöж веськöдліс Коми Республикаса туй овмöсөн веськöдлан комитетөн. Тайö кадö пыртöма уджö 1235 километр кузьта автомашина туй, 83 пос (öтувья кузьтаыс – 5 гөгöр километр). Сэки котыртöма посьяс стрöитысь, дзоньталысь да дöзьöритысь предприятие да лöсьöдöма нормативъяс серти 15 километр кузьта посьяс. Таöдз та мында поссö да туйсö республикаын эз стрöитлыны.

Вячеслав Иванович бӧрйылыны РСФСР-лӧн Медвылыс Сӧветса, Россияса
Федеральной Собраниелӧн Федерация Сӧветса, Коми АССР-лӧн Медвылыс Сӧветса,
Коми Республикалӧн Каналан Сӧветса депутатӧн.